

Nzryrkr Jemes

Natq Ngr Nzaplxtqngr Mz Nzryrkr Jemes

Mwx Jemes yrle letz lc mz mzlir yiz 46—49 AD mz nibr nzrmcngr mz Jiszs. Yrbzle mz lr Jiu kcng tzmnc-rlrubzng mrkc Israel. Jemes lc nide mzle Jiszs, ✧ a' trnginideu aposol Jemes, mzle Jon, aposol kc tznibq kai murde vz-nqblqle Jiszs. ✧ Jemes lc trlxngiti-kaileu Jiszs, a' mz nibr nztulz-krmle mz nzbzng, sc tqlxngiti-atele. ✧ Jemes badr mzledeng nzaenzliir nzvzo-krm Mqngrkxtr mrkc Jerusalem. ✧ Mzli trboiu Jemes sc tqnginipede kzdq kxetu kxmyapxbz mz lrmakxtr kc Jerusalem. ✧ Jemes ncdz mzlede Jud kc tqyrle letz nzrpibz 'Nzryrkr Jud,' trnznginidru aposol. A' nidr kxnzetung kx nzamrlue zlwz kxnzrlxngiting. Mz nibrde nzkabzlr bade drtqde, 'Jemes Kc Tqtubq.' Mz yiz 62 o 66 AD nznibq nide murde lxngitile Jiszs.

Jemes ycmnetr-ngrde nzrlxngiti-angidrngr kx krlzle nzarlaxp-krde nigu. Rpile kx, 'Mane nzrpikr doa kx lxngitile Gct, a' trpnzng da kxmrlz kx vzpxm mz nzrlxngiti-krde.' Murde nzrlxngiti-angidrngr batrpzle mz leplz nzmncz-krbzlr mz Gct x nzvz-nqblq-krdr natqdeng. X okatle nigu murde na-acle-izbqku mz

✧ : Matiu 13:55; Mak 6:3; Galesia 1:19 ✧ : Aposol 12:1-2 ✧ :
1 Korint 15:7 ✧ : Aposol 1:14 ✧ : Aposol 12:17; 15:13-21;
21:18; Galesia 2:9, 12

nzymne-krngu. X okatr-kzle nigu nztu-amqngi-krngu mz mzli r nzatalzng; murde ma tqaleku alwx. X nzrlxngiti-angidrng okatr-kzle nigu mz nzaenzli-lrpi-krngu nyzylu-krm Jiszs. X kxmule-esz' mncku mz nzxpung; a' okatr-kzle nigu nztu-amqngi-krngu mz nzabrtzng.

Kzdung ngaldeng kx nzmyapxbzng mz letz lc nidr seleng. ✧

Natq Kcng Kai

¹ Ninge Jemes, wztrpo mz Gct x Kxetu rgu Jiszs Kxnmcp. Ryrbo bamu nimu lr Jiu kcng tzlxngitilr Jiszs, tzakiting mztea amrlx mz nrlc ka. Rpibo kx, "Nimu la."

Nzrlxngitigr Kx Tu-amqngi Mz Nzxpung

² Mzlengeng x inwengeng, mzli kznikeng nzprtz-ngrbz nzxpung bamu, na-abrtzlvzamung.

³ Murde nakrlzamu kx nzxpung lcng nzkr-lzlr nzaxplr-krdr nzrlxngiti-krmu. Nzmu natu-amqngiamu mz nzrlxngiti-krmu, sa naokatrle nimu mz nztu-amqngi-krmu mzli kx nzxpung vztr-mou-ngrmle.

⁴ Mz nzmukrde lcde, navz zvz nztu-amqngi-krmu mz nzxpung lcng, nakrlzbzle mzli kx nayrkrpx-ngrbzle. Murde mzli lc nzrlxngiti-krmu sa nabrpe, x nakrlzamu nztu-amqngingr kxmule-esz' da kx prtz.

⁵ A' doa kx trkrlz-zpwxleu da kx na-alele narlxtibzle nzyrplapxng mz Gct. Murde Gct

abrtzlvzle nzrka-nrbalq-krbzle nzyrplapxngr mz krkcng amrlx tzrlxbzng bade.

⁶ A' narlrpx-lzbq-ngrnamu mz nzvz-nqblq-krmu me pnz drtwrde, mz nzrlx-krbzmu bade nzyrplapxngr. X bzkq drtwrmu li, mz nzapu-krmu da kx twztine trmilo ngr prla.

⁷⁻⁸ Murde Gct trpnzng nrayzlu-krbzle natq leplz kcng drtwrdr tqli, mz nztekqtr-zvz-krdr drtwrdr.

⁹ Kxrlxngiti kx ngi doa txne na-abrtz murde nide doa kxmyalz mz nzobqkr Gct.

¹⁰ X kxrlxngiti kx ngi doa kxetu mz nzngini-krde bcnyr, na-abrtz mz nzavzo-lzbq-krde, murde krlzle kx Gct tramatqleu nzngini-krde bcnyr. Murde doa kx ngi bcnyr apule nrpq mqmya kc tqkawxpx mz nourla x sc tqblotrpe mzli kc mz milzpq.

¹¹ Mz nzprtz-krm nepi nzulrde aglrtille nrpq mqmya kc x sc tqtaope, x nzluli-krde lc tqyrkr-pxpebz. X nakxmu-kzpzle lc mz bcnyr kc, murde sa nabz mz mzlr nzale-krde da.

¹² Sa namrlzbz mz doa kx tu-amqngi mz nzkx-pungr x drtwrde trlcu. Murde mzli kc nzkxpungr lcng nayrkrpx-ngrbzle, sa nakabz Gct bade da kc tqmrlz tqngi nzlungr kxboi. Murde esalz-ngrde kx nakabzle mz leplz kcng tzmrlztilr nide.

¹³ Mz mzlr nzkxpungr, bzkq rpiamu kx, "Gct rpile nzabzle ninge." Nzaongr nqm q nr drtwr lc vz-rbr, murde Gct trpnzng nrayzlu-krde leplz x trpnzng doa kx krlzle nrayzlu-krde nide.

¹⁴ Nzabzngr vzpxm mz nim esz'-krm x da kxtrka kcng tqsutu zlwz drtwrm. Da kxnmulr lcng dekc tqabzle nzvecp-krde nim.

¹⁵ Murde nzaoti-zvzkr drtwrm da kxtrka kx-topwz, sa natwzle nim mz nzale-krm alwx lcde. X mz nzale-zvz-krm alwx lcde, sa natwzle nim mz Hxl.

¹⁶ Mzlengeng x inwengeng, bzkq rlr-ngrbzmuz mz Setzn nzesabrti-krde nimu, mz nzrpi-krmu kx Gct abzle nimu.

¹⁷ Murde Trte kc Heven, nide nou da amrlx kcng tqmrlz, tqtubq-esz'ngr. Nide Kxrpalz kc tqwz-ngrde da amrlx kcng tqyzlrngr mz bongavz. X kxmule-esz' da lcng nzkrizlr nztekqtrngr me nztu-ngrdr, a' Gct trpnzngr nztekqtr-krde nqmz krde. ☆

¹⁸ Mz nzvz-nqblq-krde nzmrlzkr me pnz drtwrde, Gct batrple bagu nzngini-krdu doa nedeng murde lxngitiku kx Nrpa ngr Jiszsz ngi da angidr. Murde nanginigu doa nedeng kcng ayrrngr mz leplz amrlx kcng naprtrpzng bade kalr. *

Nqmz Kr Doa Angidrng Ne Gct

¹⁹ Mzlengeng x inwengeng, bzkq mrbrtr mz drtwrmu da lcng. Lalztq-angidr-kaiamu. Bzkq anitiamu nzycmnengr. X bzkq drtwrmu ngya ani.

²⁰ Murde zngya trngiu nou da kxtubq mz nzobqkr Gct. †

☆ **1:17** Sam 102:25-27; Hibru 1:10-12 * **1:18** 1:17 Mz mzli nyz Jemes, leplz kxnxqqlung nzmwxlrng murde nzlxngitilr kx nepi, temz x vring mz bongavz nzbatrplzlr da kxbrngz x kxtrka kcng tzprtbzng mz leplz. A' nzaokrdr drtwrdr vz-rbr, murde trpnzngr da kxtrka kx vzpxm mz Gct kc tqmrlz-esz'ngr. † **1:20** Nzngyagr drtwr kxtubq vzpxm mz Gct mzli kx nzatrkatigr nide, da kc tqwai Jiszsz mz nzngyagr drtwrde nzatrkatigr Mangr-nzangiongr Yawe.

²¹ Mz nzmu-krde lcde, esablqtiamu da kx nza-trkatilr nabzmu x rtctx-ngrnamu nzngyatikr drtwrmu leplz mz nzmailz-krde nimu mz alwx. Avzo-lzbqamu mz nzlxngiti-krmu natq Gct kc tqayzuole mz nabzmu, murde natq lcng nzkrzlzr nzarlapxngr nimu.

²² A' bzkq esabrti-lzbqamu mz nzxlr-krmu natq Gct. Murde krkcng tzlaltqng mz natqde, navz-nqblqlr da kx pile.

²³ Doa kx esabrti-lzbq, apule mrlx kx mctrle mqngrde mz dzpq. X mcle kc dq da kx trtubqu.

²⁴ A' mzli kc tqvz-ngrde, mrbrtr mz drtwrde da kc tqmcle tqvz-rbr. X trpnzng da kx tekqtrle.

²⁵ Mz nqm q lcpwz, natq Gct apule dzpq mz nabzgu. Murde doa kx aoti zvz drtwrde nzmnc-ngr kxtubq kx krlzle nzarlapxngr nide mz zmatq ngr alwx, da kx alele nrade nayc-zvzbz. Murde trmrbrtru mz drtwrde nqm q kr Gct, a' vz-nqblq-zvzle.

²⁶ Doa kx rpile kx Gct na-abrtzlvzle nide, a' traclvetio-zpwxleu nzycmne-krde, ncblo kxmule lc pokiati-lzbq. Murde kxmule-esz' aleti-kzle kzdung da kxmrlz, a' Gct trabrtzlvzleu nide.

²⁷ Murde da kx abrtzlvz Gct Trtegu nidr seleng. Acive-angidramu doa kxnbzszng x olvz kx nzbzsz-kzng kx trpnzng kx na-aclveng nidr. X bzkq aleamu alwx, da kc tzwai lr nrlic, murde sa na-atrkatile nimu mz nzobqkr Gct.

2

*Bzkq Nzamrluengr Kxnzetung Myaszpxle
Leplz Txneng*

¹ Mzlangeng x inwengeng, bzkq amrlueamu kzdung leplz nzmyaszpx-krde kzdung kz leplz. Murde mz nzlxngiti-krmu Kxetu rgu Jiszs Kxnmcpz, nakrlz-kzamu kx nide txpwz kxmyapxbz mz leplz.

² Mwx kzdq mzli kzdq bcnyr kx pxi lrpz kxmrlzvxz navzm mz makxtr nyzmu, x mzli lcpwz navz-kzpq kzdq doa kxtr-rngiscu kx pxine lrpz txne.

³ Bzkq amrlueamu ncblo kc tqpxi lrpz kxmrlz, mz nzrpi-krbzmu bade kx, "Wxbu mrlcde se tqbrngz." X bzkq obqsoamu doa kxtr-rngiscu, mz nzrpi-krbzmu bade kx, "Wxbunepwz mz nibr leplz kxkqlu."

⁴ Murde mz nzale-krmu da lc, vz-rbramu mz nzobqkr Gct. X akipxamu leplz mz nzamyalz-krmu kxnzetzung kx ngi bcnyr murde narkabz bamu da. A' da kx myapxbz nzrvz-nqblqngr nqmz kr Kraes.

⁵ Lalztq-angidrmamu, kx mzlangeng x inwengeng. Gct mcpzle kxtrnzrngiscung mz nrlc ka murde nabrti zlwz drtwrdr nide x natwzlr da kcng tqvzpxm bade mz nzngini-krde King rdr x narmctilr nzlungr kxboi Heven. Murde da lcng tqpipzle nakabzle mz leplz kcng tzmrlztilr nide.

⁶ Mz nzmu-krde lcde, bzkq obqsoamu kxtrnzrngiscung. Murde bcnyrng x kxnzetzung nzatrkatilr nimu x nztwzlr nimu mz kot.

⁷ X nzrpivxiti-kzng drtq Jiszs, kc tqngi nede nimu.

⁸ Nakrlzamu nzalengr da kxtubq mz nzvz-nqblqngr natq kxmyapxbz mz Nzryrngkxtr,

kc tqrpi-ngrde kx, “*Namrlztiq kztemqng da kc tqwaiq nzmrlzti-lzbq-krm.*” ✧

⁹ A' nzm kx tqmrlzti-tpwzmu kzdung leplz, ngipe alwx. X vz-rbramu mz Lou sc Gct.

¹⁰ Kxmule esz' doa kx rtrngztibzle da amrlx kcng tqyc mz Loukxtr, a' vz-rbrti-alzule kzdq da kxtopwzne, e apu-kzpwzle doa kc tqtao mz lou kcng amrlx, x takitrde nzayrplapxngr nide.

¹¹ Murde Gct kc tqrpilē kx, “*Bzkq rmwimiq doa kx trngiu krnalzm,*” rpi-kzle kx, “*Bzkq rnibq leplz.*” Mz nzm-krde lcde, ncblo kx tr-rmwimiu doa kx trngiu krnalzde, a' rnibq doa, rnzlvzole nivz kc tqngi nou Loukxtr atwrnrngr. ✧

¹² Gct sa na-ayzlu-ngrbzle bamu mz nzvz-nqblq-krde da amrlx kcng tqpiamu x tqaleamu, mz nzmc-krde kx vz-nqblqamu natqde mz nzmrlzti-krmu leplz o trtingr.

¹³ Trpnzngr nzyckr drtwrde doa kx tryc-kz-ngru drtwrde leplz. A' doa kx yc mz drtwrde leplz, namcle nzyckr drtwr Gct nide mzli kc napipx-ngrde neke tubq x neke vz-rbr.

Mane Nzrlxngitix-ngrpwz Gct, A' Trpnzngr Kx Vz-nqblqle Natqde

¹⁴ Mzlengeng x inwengeng, mane nzrpikr doa kx lxngitile Gct, a' trpnzngr da kxmrlz kx vzpxm mz nzrlxngiti-krde. Murde nzrlxngitingr kxmule lc trkrlzleu nzarlapx-krde nide.

¹⁵ Nzmu kzdung kztemqng kx trpnzngr scdr lrpz x trpnzngr nadr dakxnzng,

✧ **2:8** Nzrlaszng 20:12-16; Livae 19:18; Lou Kcpwz 5:17-21; Matiu 19:19; Mak 12:31; Luk 10:27; Rom 13:9; Galesia 5:14 ✧ **2:11** Nzrlaszng 20:13-14; Lou Kcpwz 5:17-18

¹⁶ mane nzrpi-krbzme badr kx, “Krka'-ngrne kx namnc-zpwxamu, nrkrdrtdqmu namrlz, x nelzmu nakrlc,” a' mzli lcpwz trpnzngz da kx okatr-ngzn nldr. ?Memule, nzycmnetx-ngzpwz kxmule lc krlzle nzokatr-krde nldr?

¹⁷ Mz nqmz lcpwz, mane nzlxngiti-krm Gct, a' mzli kcpwz trvz-nqblqwg natqde mz nzale-krm da kxmrlz kxnaokatrngz.

¹⁸ Murde doa kx lxngiti-angidrle Jisz, ale-kzle da kxmrlz kx naokatrngz. A' doa kx rpile kx lxngitile Jisz, a' trpnzngz da kxmrlz kxalele, rblx nzmrcngz nzrlxngiti-krde.

¹⁹ Nzrlxngiti-angidrngz navzmi nzrvz-nqblqngz natq Gct. Mane nzpikr doa kx lxngitile kx Gct esz'txu, murde drka' nzlxngiti-kzlr da lc. Dekc tznrcti-lzbq-ngzdr mz zmwzlr, murde nzkrzlr kx Gct sa na-ayrplapxle nldr mz nznzlvzo-krdr natqde. Opx angidr kx trngi-tpwzu nzrlxngitingz kxmule lc kx na-arlapxle leplz.

²⁰ Bzq angqngutitr-lzbqamu mz nzpdxpx-krmu nztekqtr-krmu drtwrmu. Murde mane nzrlxngititx-ngzpwz, a' trpnzngz kxvz-nqblqle natq Gct.

²¹ Gct rpile kx melrmqgu Ebraam tubq mz nzobq-krde, murde rlrpx-lzbq mz nzvz-nqblq-krde natq Gct, dekc tqrlr-ngzrbzle mrlxde Aesak mz olta.

²² Mz nzmu-krde lcde, opx angidr kx nzlxngiti-krde Gct vzmi nzvz-nqblq-krde natqde. Atutrlle nzrlxngiti-krde mz da kx alele mz nzvz-nqblq-krde natq Gct.

²³ Krlc drtwr ngr Nzryrngzkrxtr kc tqrpile

kx, “Ebraam tubq mz nzobqkr Gct, murde brti drtwrde nide.” ✧ Dekc tzerpi-ngrdr kx nide kzte Gct. *

²⁴ Mz nzmu-krde lcde, opx angidr kx nztubqkr doa mz nzobqkr Gct vzpxm mz da kx alele mz nzvz-nqblq-krde natqde. A' nztubqngr trvzpx-puu mz nzrlxngitix-ngrpwz.

²⁵ Kxmu-kzle lc mz olvz kc tqngi srlx, drtqde Reab. Murde adwatrle lr Israel kcng nzling ma nyzde. X mz nibrde, sc tqaprxpeleng mz nzo-zli-krdr lrpzki kzble, murde narlapxng. Dekc tqrpinger Gct kx Reab tubq mz nzobq-krde, mz nzvz-nqblq-krde da kx alele. ✧

²⁶ Nzrlxngitingr kx trvz-nqblqleu natq Gct apule nrkrdrdq kx trycminiu, murde nzbzng rilldr.

3

Zmatq Ngr Natq Lepz

¹ Mzleingeng x inwengeng, bzkq kqluamu mz nzalvztr-krmu natq Gct. Murde suti drtwrde kx nigu kxnalvztrng mz natqde natubqku mz nzalvztr-krqu. A' kxtrnzalvztr-angidrung, nzayr-plapxkr Gct nidr namyaszpxle nzayrplapx-krde leplz kcng tzalvztrlr.

✧ **2:23** Nou 15:6 * **2:23** 2:21-23 Gct abrtzlvzle nzrlxngitigr Ebraam. A' nzmu Ebraam trnavz-nqblqleu natqde, drtwr ngrde kx trlxngiti-angidrleu nide. Nzvz-nqblq-krqu natqde vzpxm mz nzrlxngiti-krqu. X nzrlxngiti-angidr-krqu navzmi zvz nzvz-nqblq-krqu natqde. Pol pi-zvzle kx nztubq-krqu vzpxm mz nzlxngiti-krqu Gct. X Jemes aopxmle bagu kx nzrlxngiti-angidr-krqu navzmi kz nzvz-nqblq-krqu natq Gct. Jemes x Pol drtwrdr esz'ti.

✧ **2:25** Josua 2:1-24; Hibru 11:31

² Vz-rbr-zvzku amrlx ngrgu. A' na-abzku nzpi-zvz-krgru da kxmrlz kxtubq. Murde doa kx trvz-rbrmz nzymne-krde, nide mrlx kx tubq-esz'ngr, x krlzle nzacive-lzbq-krde mz da amrlx.

³⁻⁴ Na-aoti drtwrgu lcsu kxetu. Kxmule-esz' twz nenq kx xplr, a' nzkriz nzyalvzng mz nrz kx-topwzne, murde navo mrkc tqsutu drtwr kapten navokile. X na-aoti kz drtwrgu hcsi. Murde nrkrdrtdqde kc tqwzpx vz-nqblq-ngrde leplz nqvi kcng tqtopwz tzpetrpzng mz narde.

⁵ Mz nqm q lcpwz, nao leplz topwzne, a' nzymne-krde krlzle nzbatr-krbzle da kxetu. Da kc tqwai kz nqngi nyr kxtopwz. Murde krlzle nzbatr-krbzle nyr kxetu.

⁶ Delc, naogu apule nyr. Murde natq kxpipzne nzkrizlr nzodatingr da amrlx mz nzmnc-krgru. X kxnamu nzymne-krgru, dekc tqyalvzle nigu mz lrpzki kx o-zliku mz nrlc ka. Kx Setzn kc tqacivele naogu, nzymne-krgru sa na-atrkatile leplz amrlx kcng tqmncku badr, mz nzapu-krde nyr kxetu kc tqrbx nizamzng.

⁷ Leplz nzkrizlr nzayamqmiti-krdr animol amrlx mz nrlc, kxmule-esz' utc ngr peto, o nc ngr prla.

⁸ A' trpnzng doa kx rkriz nzayamqmitingr naode. Murde naode pxtpx-ngrde nzmnc-lrpi-krde, a' rpi zvz kz da kxtrka-esz'ngr. X natq kx vzpxm mz naode apule da kxrlq kxrnibq.

⁹ Naogu dekc tqglqlz-ngrgu Kxetu kc tqngi Trtegu, x dekc kz tqrpibqti-ngrgu leplz kc tqwzng Gct mz nzaotr-krdr nide.

¹⁰ Delc, natq ngr nzrglqlzng x natq ngr nzrpibqtingr nzvzpxmqng mz nao kxesz'. X

trtakitrdeu nzale-krdu da kxmule lc. ☆

¹¹ Trpnzngr aulz kx ngqlz-ngrm lue x dcpiz mz mzli lapwz.

¹² Nc bia trpa-ngrdeu nzlu. X nc brpi trpa-ngrdeu bia. X dcpwe rblx nznngikr lue le. Mzli kx natq kxtrka x natq kxmrlz nzvzpx-ngrmlr mz nao doa kxesz', drtwr ngrde kx nabz doa lc trtubq-angidru, x narlr-ngrbzle mz Gct nzalqngi-krde nide.

Nzyrplapxngr Angidr Vzom Mz Gct

¹³ Neke mz nimu rpilc kx nide doa kxyrplapx kx krlz-angidrlc da kxtubq, na-alvztrpzle da lcng mz leplz mz nzale-krde da kxmrlz x mz nzavzozlbq-krde. Murde nqm q lcng nzvzpxmqng mz nzyrplapxngr kx kabz Gct.

¹⁴ A' neke mz nimu nabzde yrbulz-ngrm nzdobungr mz drtwr kxmwa x nzaetu-lzbqngr, bzkq glqpx-lzbqq kx nim doa kxyrplapx. Murde nzrglqpx-lzbqngr pokia-ngrde nzrpinger da kxtubq mz nzobqkr Gct.

¹⁵ X da lcng trnzvzpxpwung mz nzyrplapxkr Gct. A' da lcng tqtrka nzvzpxmqng mz nzaokrdr drtwr lr nrlc ka, x mz nztrkibrngr, x mz nqm q nr drtwr kx nzbatrpz drka'ng.

¹⁶ Murde nzdobungr x nzaetu-lzbqngr vzmi lxblr zvz kz nzaki-lzbqngr x da kxdrka'ngr amrlx.

¹⁷ A' nzyrplapxngr kx kam Gct bagu batr-kaiple bagu nzrlr-krbzku mz Gct nzalqngi-krde nigu mz alwx ngrgung. Murde namncku badr leplz mz nrw, naokatrku nidr, nalalztq-kzpzku badr,

☆ **3:10** Matiu 12:36-37

nayc mz drtwrgu nidr, x namrlzti-kzku leplz. X navz zvz, nzale-krngu da lcnng mz drtq kxvq.

¹⁸ Murde doa kx aodutr-lxblrlle leplz mz nrw, sa nabatrpzle mz leplz nzmnc-lxblr-krdr mz nrw. X leplz amrlx sa na-aleng da kxtubqng.

4

Naesablqtiku Da Kxtrka

¹ ?Krlzamu nike nou nztalwznggr x nzotangr mz mzlirmu? Nzvzpxmqng mz nztrkibr-krmu, murde traotiu drtwrmu da kx suti drtwr kztemung x da kxtubq mz nzobqkr Gct.

² A' sutitx zlwx drtwrmu da kx trpnzngr sc-mung, x sc tqrnibqpeamu doa mz nztwz-krmu dztudeng. Rkcmnz-ngnamu da kx rblx nztwz-krnamuleng, sc tqtalwzpeamu x tqotablpeamu, mz nzrtwz-krmung. Vz-rbramu! Trtwzwamuu da lcnng tqsutu drtwrmu, murde tr-rlxtipwzmuu mz Gct.

³ O trtwzwamuu da kcng murde rlxamu da mz drtwr kxtrka. X suti txpwz drtwrmu da kx nabrtzlvz nrkrdrtmung, a' traotiu drtwrmu da kx xngibz kztemung.

⁴ Apuamu olvz kx vz zvz nzmwimi-krdr ncblo kzbleng. Murde nzmrlzti-krmu dalr nrlc ka myaszpxle nzmrlzti-krmu Gct. X krkcng kzte leplz kx nzpctxpx-ngdrdr Gct, nidr enqmi rdeng.

⁵ X krlzamu kx ncblo dobulvzle olvz rde mz nzsutikr drtwrde ncblo kzble. Mz nqm q lcpwz Nzryrngrkxtr alvztr-ngrde nigu kx Mqngkrkxtr kc tqamncpxm Gct mz nabzgu dobulvz-kzle nigu mz doa x da kznikeng suti drtwrgu nzmyaszpx-krde Gct.

Gct Okatrle Kxnzavzo-lzbqng

⁶ Mz nzmu-krde lcde, Gct okatrle nigu mz nzaovxio-krdu nqm̄ nr drtwr kxtrka lcng amrlx, mzli kx rlxti-ngrbzkule bade. Murde Nzryrn-grkxtr rpile kx, “*Gct esablqtile kxnzqlpx-lzbqng, a' tubz mz nibr kxnzavzo-lzbqng.*” ☆

⁷ Mz nzmu-krde lcde, avzo-lzbqamu mz nzmnciz-krbzmu mz Gct. X otaamu badr Setzn, kc tqaxglrbzle drtwrmu lcng tqtrka, murde nadwaszle nimu.

⁸ Esablqtiamu alwx ngrmung x rlr-ngrbzmu mz Gct nzalqngi-krde nabzmu, murde trvz-nqblqwamuu nide mz nabzmu atwrnrngr. Mnc-aepztrpzm̄ bade, murde namnc-aepztr-kzpz bamu.

⁹ Nabzmu natalvzo zlwz murde nzpxtpx-krmu Gct. Drtwrmu navz x nayrnimiamu alwx ngrmung. Natekqtramu nzyrpale-krmu mz nzal-krmu. X natekqtr-kzamu nzabrtzlvz-krmu da kxtrka mz nzyrni-kato-krmu.

¹⁰ Murde nzm̄ na-avzo-lzbqbm̄ mz mz Gct, sa na-amyalzle nimu. ☆

Bzkq Aycmne-atrkatiamu Kztemung

¹¹ Mzlengeng x inwengeng, bzkq rpibqtiamu x aycmne-atrkatiamu kztemung kxnzrlxngiting. Murde mz nzale-krmu da lc, trvz-nqblqwamuu natq Loukxtr mz nzrpi-krde kx namrlzti-lzbqku. X apu-kzle kx rpiamu Loukxtr vz-rbr. A' trngiu nzvz-krmu mz nzrp̄ngr kx Loukxtr lc vz-rbr o trtingr, a' navz-nqblq-tpwzm̄.

☆ **4:6** Nzryrplapxng 3:34; Jemes 4:6; 1 Pita 5:5 ☆ **4:10** Matiu 23:12

¹² Gct rkam Loukxtr, x nide esz'-krde kx takitrde nzipix-krde neke tubq x trtubqu, murde na-arlapxle kxnztubqng x naodatile kxtrnz-tubqung mz Mzli Kxmatq kc navzm. A' trtak-itrdeu nimu nzrpibqti-krmu x nzaycmne-atrkati-krmu kztemung.

Bzkq Glqpx-lzbqamu Mz Drtwr Kx Yrlqamu

¹³ Lalztqmamu mz da lc. Bzkq glqpx-lzbqamu mz nzrpi-krmu kx, "Koma o kalrla ninge kc tqvzpep mz mztea kc. X namnctix elr yiz naesz', murde na-abzox kzdq nzwzngnr mrlcde mz nzatatr-krmc trau."

¹⁴ Murde trpnzngnr nimu kx rkrlz da kx naprtzbz bade kalrla. Mzli nyzgu mrbcnepwz, apule zsikapu kc tqvzdz. Mc-ngrgule mzli pipzne x sc tqmrbrpe mou.

¹⁵ A' nzymne-krmu nakxmule sele, "Sa namncbex x na-alex drtwr lc tqyrlqx, nzmu kx Gct tqrlr-ngrmlele."

¹⁶ A' mzli ka nzglqpx-lzbq-krmu sa tqvzbeng. A' nzglqpx-lzbqngnr amrlx vz-rbrtx, murde drtwr ngrde kx trabrtrpwzmuu drtwrmu mz Gct.

¹⁷ Mz nzmu-krde lcde, nzmu kx tqkrlz-angidrq me pnz drtwr Gct mz da kx na-aleq, a' tralewq, taoq mz alwx.

5

Bcnyr Kxnzvvz-rbrng

¹ Nimu kcng tznginidr bcnyrng, lalztqmamu bange. Yrnimi-lzbqamu mzli ka, murde nza-yrplapxngnr nimu x nzkxpu-krmung ycpe pipz nzkaputr-krmrng, x namatq-esz'ngr.

² Mzli lc dztumung x trau scmung sa na-apulr brmrda. X lrpzmung sa na-apulr da kx yrti ninr.

³ Trau scmung sa na-atrkatile nimu, murde atatrparamu x ayrbzqgamu mz da kxtrka mz nzngini-krmu kxnztrkibrng. Gct mcle da lc x sa na-ayrplapxle nimu mz nyr mz Hxl. Murde aoti txpwz drtwrmu nzatamutingr da, a' trkrlzwa-muu kx mzli nyzmu mrbcnepwz, x ycpe pipz Kraes nzvz-krmle mz nzaryplapx-krde nimu!

⁴ Angqngutitramu mz trau scdrng, krkcng tzawzamu mz nrlanc nyzmung. Lalztq-angidrmamu. Murde kxmule-esz' pxtxpx-ngrnamu nzxlr-krbzmu nzyrnimi-krbzlr kx vz-rbramu, a' Gct kc tqrninr xlrpele nzyrni-krdr.

⁵ Mzli ka tqmnc-ngrnamu mz nrlc apuamu poi kcng tzyrlvzng murde tzmu-txpwzng, a' trnzkrzlru kx ycpe pipz nznribqngr nidr. X xpeamu da kxlqlwx kxkqlu murde na-abrtzlvz nrkrdrtqmung. A' trkrlz-kzwamuu kx ycpe pipz Gct nzayrplapx-krde nimu.

⁶ Twzamu leplz kxnztubqng mz kot x batrpzmu nzbz-krdr mz zmatq ngrmu kx myapxbz. A' trpnzngr scdr zmatq mz nzarlax-krbzlr mz mqmu.

Bzkq Drtwrmu Ma Nzaenzli-krmu Nyzlu-krm Kraes

⁷ Mzlangeng x inwengeng, bzkq rkrkxamu x drtwrmu ma nzaenzli-krmu nyzlu-krm Kxetu. A' na-apuamu kxnznginyzdr nrlanc. Nzaenzli-kailr tewa nzayayrti-krde drtc', murde napetilr da nyzdrng. X nzaenzli-moulr tewa mz nzokatr-krde nzlvcpulz-krm da nyzdr.

⁸ X nimu kz, bzkq drtwrmu ma mz nzaenzlingr, a' natu-amqngiamu. Murde Kxetu rgu ycpe pipz nzyzlu-krmle.

⁹ Bzkq drtwrmu lctitr-lzbq, murde ma tqayr-plapx Gct nimu mz nzvz-rbr-krmu lc. Murde ycpe pipz nzadcpz-lzbq-krmle mz nzpipx-krde neke tubq x neke vz-rbr.

¹⁰ Na-apu-kzamu profet kcng bqnc kcng tzpipxlr natq Gct. Drtqdr etq mz nzale-krdr da kxbrngz. X trnzrkrkxung, a' nzaenzli-lrpilr nzayrplapxkr Gct krkcng tzatrkatilr nidr.

¹¹ Amrlueku leplz kcng tztu-amqngitrpzng mz Gct mzli kx da rblx-ngrde, da kc tqwai Job. Krlz-angidramu kx Yawe ayrkrpxbzle nzetqkr drtqde, murde Yawe aodu-zvzle leplz x yc kz mz drtwrde nidr. ✧

Bzkq Da Kx Naesalz-ngrnamu

¹² Mzlangeng x inwengeng, bzkq esalz-ngrnamu bongavz, nrlc, x kzdung kz da. Bzkq pokiamu, a' da kx napi-tpwzmu mz nzymne-krmu, 'Eu' o 'Trtingr,' murde ma tqayrplapx Gct nimu mz natq kx piamu. ✧

Nzkrka'ngr Kxmatq

¹³ Nimu kcng tzaxvctrpzng mz Kraes na-aleamu da lcng. Doa kx drtqde etq, nakrka'bz mz Gct. Mrlx kx abrtz, na-angrlvzle Gct.

¹⁴ Doa kx yagox, nakqlele kxnzetu r lrmakxtr, murde na-aelulr nide tolo mz drtq Kxetu, x nakrka'-ngrdr kx Gct na-amrlzbzle nide.

¹⁵ X Gct sa na-ayzlu-ngrbzle nzkrka'-krdr, mz nzvz-nqblq-krde nzbrtikr drtwrdr nide. X namrlz-moule nrkrdrdq krkc tqyagox. X nzmu zyagox kc kx tqvzpxmle mz alwx ngrdeng, sa naipq kz Gct nide.

¹⁶ Mz nzmu-krde lcde, plzpxbzmu alwx ngrmung mz kztemung, x krka'-lzbq-ngrnamu, murde namrlz-mouamu. Murde nzkrka'kr doa kxtubqbz mz nzobqkr Gct matq-esz'ngr x ngidati kz.

¹⁷ Murde profet Elaeja kc bqnc, tqngi kz leplz apule nigu. A' mz nzlxngiti-krde Gct, krka'bz bade kx tewa bzkq dc. X tewa trdctileu yiz tq x temz esz'mz.

¹⁸ X mz nibrde, krka'-mopwz mz nzrlxti-krbzle mz Gct nzadc-krde tewa, x tewa kc tqdc ate mou mz nzalvcputilz-krmle dalr nrlanc. ✧

Okatramu Krkcng Tzrlaszpelr Nzrlxngiti-angidrngr

¹⁹ Mzlengeng x inwengeng, naokatramu doa kcng tzrlaszlr nzrlxngiti-angidrngr, murde navz-nqblq-moulr Gct.

²⁰ Murde nzarlapxkr Gct nidr x nzipqpx-krbzle alwx ngrdrng sa navzpxm mz nzokatr-krmu nidr.
Delape. Ninge *Jemes*.

✧ **5:18** 1 King 18:1, 41-45; Sam 65:9-10

Nzryrngrkxtr Kc Ate Rut x Sam
The New Testament plus Ruth and Psalms is the
Natügu language of the Solomon Islands
Buk Baibel long langguis Natqgu

copyright © 2008 Wycliffe Bible Translators, Inc.

Language: Natqgu (Natügu)

Translation by: SITAG

This translation is made available to you under the terms of the Creative Commons Attribution-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not make any derivative works that change any of the actual words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2017-11-17

PDF generated using Haiola and XeLaTeX on 28 Dec 2024 from source files dated 31 Aug 2023

fb2b7f06-e254-5fb7-b59d-ee21d5d7a93f